

KKM bakal mulakan kajian klinikal terhadap pesakit COVID-19 - Dr Noor Hisham

Astro Awani

19 April 2020

Fareez Azman,

PUTRAJAYA: Kementerian Kesihatan Malaysia (KKM) bakal memulakan kajian klinikal membabitkan pesakit COVID-19 di negara ini bagi menguji keberkesanan dan keselamatan empat regimen rawatan menerusi Kaji Selidik Solidariti yang dilancarkan Pertubuhan Kesihatan Sedunia (WHO).

Menurut Ketua Pengarahnya, Datuk Dr Noor Hisham Abdullah, kajian klinikal itu akan dilakukan di kalangan pesakit COVID-19 yang memenuhi kriteria ditetapkan. "Kaji selidik yang diselaraskan oleh WHO di seluruh dunia ini adalah satu usaha pengumpulan data dan perbandingan keselamatan serta keberkesanan empat regimen rawatan menggunakan kombinasi Remdesivir, Lopinavir / Ritonavir, Interferon beta, Chloroquine dan Hydroxychloroquine.

"Sehubungan itu, KKM bakal memulakan kajian klinikal bagi menguji keberkesanan dan keselamatan ubat Remdesivir untuk merawat pesakit COVID-19 dalam masa terdekat.

"Sembilan (9) buah hospital KKM yang mengambil bahagian di dalam WHO Solidarity Trial ini telah bersedia untuk memulakan pengambilan peserta kajian di kalangan pesakit COVID-19 yang memenuhi kriteria yang ditetapkan," katanya dalam sidang media di Putrajaya pada Ahad.

Setiap regimen rawatan yang digunakan itu tambah Hisham, mendapat kelulusan daripada Badan Regulatori Farmasi Negara (NPRA) untuk memastikan keselamatan setiap pesakit yang diuji.

"Jawatankuasa Etika dan Penyelidikan Perubatan (MREC) telah bekerjasama rapat dengan Badan Regulatori Farmasi Negara (NPRF), KKM yang bertindak sebagai badan regulatori yang bertanggungjawab meluluskan penggunaan ubat tersebut dalam kajian klinikal ini.

"Penilaian telah dibuat berdasarkan tiga aspek utama merangkumi aspek keselamatan, kualiti dan keberkesanan awal ubat tersebut berdasarkan data-data yang telah dikemukakan," ujar beliau.

Tambahnya, penyertaan Malaysia dalam kaji selidik sedunia ini dijangka dapat membantu dalam pencarian ubat menyelamatkan nyawa pesakit COVID-19 melalui penilaian keselamatan dan keberkesanannya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/kkm-bakal-mulakan-kajian-klinikal-terhadap-pesakit-covid-19-dr-noor-hisham-239132>